



Apersortittoqartillugu, akunnaallisoortoqartillugu, katittoqartillugu ataasiartumik immikkut matoqqasumik aaqqissuussinissamut imigassanik kimittuunik kimikittunillu neriniartarfinni, imerniartarfinni, akunnittarfinni il.il. ulluni sapaammiik sisamanngornermut ullaassakkut nalunaaqutaq 04.00 sassaallinissamut qinnuteqartoqarsinnaanngornissaa anguniarlugu imigassamut inatsismmut allannguutissamik saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. (Tassani ilaassapput ukiuni 25-ni, ukiuni 50-ni katiffissiornerit il.il.) peqatigiiffiit nalliuttorsiorneri, siulersuisut ataatsimiinneri, Inatsisartunut qinersineq, kommunalbestyrelsinut qinersineq il.il.

(Inatsisartunut ilaasortaq Malene Vahl Rasmussen, Demokraatit)
(Siullermeerneqarnera)

Siullermik Inatsisartunut ilaasortaq Malene Vahl Rasmussen imigassamut inatsimmi tamanut saqqumiinnartumik naleqqutinngitsumik allaqqasoqarneranut tikkuussisumik siunnersuuteqarsimaneranut qujaffigerusupparput.

Assersuummik saqqummiussilaarusuppunga. Imaappormi inuit amerlanerit arfininngornermi katittarmata. Tamanna isumaqarpoq ukiut 25-it qaangiutereertullu marlungornermi imaluunniit pingasunngornermi, ukiut ilasat apeqqutaatillugit, katiffissiortussanngussasut. Najungaqarfigisami nerisarfiit arlaanni imigassartalinnik nerilluarlutik ulloq malunnartinniarunikku, festernertik unnuap qeqqanut unitsittariaqartarpaat.

Kialluunniit assortorsinnaagunangilaa tammanna ajormat. Siunnersuummi matumani Inatsisartunut ilaasortaq Malene Vahl Rasmussen-ip neriniartarfiit ulluinnarni ataasiartumik sassaallinissamut qinnuteqaateqarsinnaanngornissaat anguniarlugu inatsimmik allanngorsaarusunnera isumassatsialaavoq, Demokraatillu tamakkiisumik tapersiinertik nalunaarutigissavaat.

Tamatumuuna siunnersuut akuerineqarnissaanut innersuupparput Inuussutissarsiornermut Ataatsimiititaliamut sammineqarnissaanut ingerlateqqillugu.